

元明史料叢編 第三輯

元

二十卷

(清·宣統三年層漪堂刊本)

書

(五)

清·曾
濂撰

文海出版社

有限公司
印行

元書卷五十五

邵陽曾廉謨

高李楊二王徐孟留葉列傳第三十

高智耀西夏人也世仕夏國曾祖逸大都督府尹祖良惠右丞相智耀登本國進士第夏亡隱賀蘭山太宗訪求河西故家賢者眾舉智耀召見將用之遽辭歸闕端太子鎮西涼儒者皆隸役智耀因入謁言儒者同廝養非便請除之太子從其言欲奏官之亦不就憲宗卽位智耀入見復言儒者學堯舜禹湯文武之道有國家者用之則治宜養成其才以資用不宜徭役以困之也帝問儒家何如巫醫對曰儒以綱常治天下豈方技所得比帝曰善前此未有以是告朕者乃詔復海內儒士徭役無有所與世祖在潛邸素聞其賢及卽位召之與帝師八思八俱見智耀又力言儒術有補

治道反復數千言帝鑄印授之命凡免役儒戶皆從之給公文爲左驗時淮蜀士遭俘虜者皆沒爲奴智耀奏言以儒爲驅古無有也陛下方以古道爲治宜除之以風厲天下帝然之乃拜智耀翰林學士命循行郡縣區別之得數千人有疾之者多言其詭濫帝詰之對曰士譬則金也金色有淺深謂之非金不可才藝有淺深謂之非士亦不可帝悅更寵賚之智耀又言國初庶政草創綱紀未張宜倣前代置御史臺以糾察官常至元五年立御史臺用其議也後擢智耀西夏中興等路提刑按察使會西北藩王遣使入朝謂本朝舊俗與漢法異今留漢地建郡邑城郭儀文制度遵用漢法其故何如帝求報聘之使以折其問智耀入見請行帝問所荅畫一敷對稱旨卽日遣就道至上京病卒後贈崇文贊治功臣金紫光祿大夫司徒柱國甯國公諡曰文忠子睿年十六授符寶

郎久之授唐元衛指揮副使歷翰林待制禮部侍郎除嘉興路總管禽宿盜有聲擢江東道提刑按察使時郡內草竊陸梁聲言圍宣城郡將怯懦城門不開睿召責之曰寇勢方熾官先示弱民何所賴卽命密治兵衛而洞開城門寇以有備不敢進遂討平之遷浙西道肅政廉訪使鹽官州民有結黨持郡邑短長者睿悉按以法拜南臺侍御史進中丞復除淮東道肅政廉訪使盜竊眞州庫鈔有司追逮平民睿讞得其情皆縱遣之未幾遂獲眞盜復還南臺中丞睿爲人敏決然務持大體有儒者風延祐元年卒累贈推忠佐理功臣太傅開府儀同三司上柱國甯國公諡曰貞簡子納麟別有傳

李昶字士都東平須城人也父世弼從外家受孫明復春秋金興定二年父子同經登進士第褒貶各異時人以比向散世弼老爲

東平教授昶釋褐授溫縣丞召試尙書省祿再調漕運提舉國兵
下河南奉親還鄉里行省嚴實辟授都事改行軍萬戶府知事實
卒子忠濟嗣遷昶爲經歷居數歲忠濟頗怠政事昶勸之接納正
士黜遠小人去浮華敦朴素損騎從省宴遊以弭未然之禍時朝
廷欲抑諸侯法制寢密忠濟弗能自束昶以親老求解不許俄丁
父憂杜門教授一時名士李謙馬紹吳衍皆出其門世祖伐宋次
濮州聞昶名召問治國用兵之要昶言治國在用賢立法正本清
原用兵以伐暴救民在不嗜殺世祖嘉納之明年卽位召赴開平
時徵需煩重科徵賦稅雖通戶不貸昶上書中書曰百姓困於弊
政久矣聖上龍飛首頒明詔天下之人如賦更生拭目傾耳以俟
太平半年之間人漸失望良以渴仰之心大切興除之政未孚故
也側聞欲據丁已戶籍科徵賦稅比之見戶或加多十六七止驗

見戶應輸猶恐不逮復令包補逃故必至艱難苟不以撫字安集爲心惟事供億則諸人皆能之豈聖主擢賢更化之意哉於是省府爲蠲逋戶之賦中統二年內難平昶上表賀因以諷諫曰患難所以存敬戒禍亂將以開聖明伏願日新其德雖休勿休戰勝不矜功成不有和輯宗親撫輯將士增修庶政選用百官儉以足用寬以養民安不忘危治不忘亂恆以北征宵旰之勤永爲南面逸豫之戒帝稱善久之會嚴忠濟罷弟忠範代表請昶師事之特授翰林侍講學士行東平路總管軍民同議官朝議令老疾輸賦昶上言聖主卽位之初凡鰥寡廢疾之人命所在優恤去歲省府常有榜諭給糧收養旬月之間一予一奪非所以示信也遂條十二事剷除宿弊至元元年遷轉法行減併路府州縣官於是謝事家居五年起爲吏禮部尙書品格條式多所裁定凡議大政宰相延

置上坐傾聽其說六年阿合馬議以制國用司爲尙書省昶請老
歸七年授南京路總管兼府尹不赴八年爲山東提刑按察使務
持大體不事苛細未幾致仕二十二年昶已八十三復遣使徵之
以老疾辭賜田千畝二十六年卒世祖甚賢昶嘗燕處望見昶輒
斂容曰李秀才至矣其見敬禮如此

楊果字正卿祁州蒲陰人也徙居許昌以章句授徒爲業登金正
大元年進士第爲偃師令以廉幹稱屢改劇縣有應變才金亡楊
與徵河南稅課起果爲經歷未幾史天澤經略河南復用爲參議
時兵革之餘法度草創果隨宜贊畫民賴以安世祖中統元年命
果爲北京宣撫使明年拜參知政事至元二年以例罷政猶詔與
左丞姚樞等日赴省議事六年出爲懷孟路總管大修廟學以前
嘗爲中書執政移文申部特不署名以老致仕卒諡文獻

王鶚字百一開州東明人也金正大元年進士第一人及第授應奉翰林文字累官同知申州事行蔡州汝陽令金主遷蔡詔尙書移文恆山公武仙進兵金主覽書問誰爲之右丞完顏仲德曰前翰林應奉王鶚也曰朕卽位時狀元耶卽召見惜擢用之晚授尙書左右司郎中蔡陷將被殺萬戶張柔聞其名救之輦歸館於保州世祖在藩訪求遺逸遣趙璧聘之及至使者數輩迎勞召對進講孝經書易所以齊家治國每夜分乃罷歲餘乞還賜以馬仍命近侍闊闕柴禎等五人從之學繼命徙居大都賜之宅嘗因閒請曰往金主自經其奉御絳山焚葬汝旁禮爲舊君有服願往祭葬世祖義而許之至則爲水所沒設牲酒爲位哭焉世祖卽位首授翰林學士制詔典章皆所裁定至元元年奏言自古帝王得失興廢可攷者以有史在也國家以神武定四方皆出成吉斯皇帝廟

謨雄斷所致若不乘時紀錄竊恐久而遺亡宜置局纂修寔錄附修遼金二史又言唐太宗始定天下置宏文館學士十八人宋太宗承太祖開創之後設內外學士院史冊爛然號稱文治堂堂國朝豈無英才如唐宋者乎於是始詔立翰林國史院鶚遂薦楊奐元好問修金史舉李治李昶王磐徐世隆高鳴爲學士楊恕孟攀鱗爲待制王惲雷膺爲修撰周砥胡祗通孟琪閻復劉元爲應奉一時遺老碩儒搜抉殆盡惟好問已先卒有言事者謂宰執非其人詔儒臣廷議可任宰相者時阿合馬巧佞欲乘隙取相位眾知其非莫敢言鶚奮然擲筆曰吾以衰老之年無以報國卽欲舉任此人爲相吾不能插驢尾矣振袖而起奸謀爲之中止五年乞致仕詔歲給祿終其身有大事則遣使就問焉十年卒諡文康鶚性樂易爲文章不事雕飾嘗曰學者當以窮理爲先分章析句乃經

生舉子之業非爲己之學也無子以外孫周之綱承其祀之綱官終翰林侍讀學士

王磐字文炳廣平永年人也金人遷汴舉家南渡河居魯山磐從麻九疇學於鄆城客居貧甚日作糜一器畫爲朝暮食正大四年第經義進士授歸德府錄事判官不赴及河南被兵磐轉入淮襄閒宋荆湖制置司辟爲議事官襄陽兵變復北歸至洛會楊惟中被旨招集儒士深禮磐東平萬戶嚴實興學養士遂迎爲師受業者數百人中統元年卽拜益都路宣撫副使以疾免李璫禮致之磐亦樂青州風土也乃買田湖上題其居曰鹿菴將終焉無何璫謀叛磐覺走入京師世祖見而嘉之大軍討璫以磐參議行臺事磐挈妻子至東平召拜翰林直學士同修國史出爲眞定順德等路宣慰使復爲翰林學士見宰相首言方今害民之吏轉運使爲

甚至稅人白骨可痛心也遷太常少卿乞致仕不允時猶仍國俗
天子惟有帳殿遇朝會臣庶喧雜磐請申闕入宮門之禁曲阜孔
子廟代給西戶供灑掃復其家尙書以括戶故盡入諸官磐言林
廟百戶歲不過得鈔六百貫此一六品官俸耳朝廷疆域萬里財
賦萬億計豈愛此不以待孔子哉夫於府庫所益無多而損國體
甚大此類是也時皆聽其言磐以老再請致仕仍不許磐以爲古
者五十從政七十致仕所以資其財力閔其衰老而養其廉恥之
心也遂以疾請斷月俸帝遣使慰諭之仍給之祿磐不得已復起
朝議汰冗官權近以按察司不便其私欲併省之磐奏言各路去
都遠官吏貪污小民無所控告惟賴按察司申理耳以爲冗而罷
之則恐冤死者衆矣若曰京師有御史臺足通民隱是大不然夫
御史臺糾察朝廷百官京畿州縣尙有弗及況能周徧外路千百

城乎至欲併入運司運司專以營利增課爲職與管民官常分彼此豈暇顧細民之冤抑哉會御史大夫王昔帖木耳意同磐按察司遂得不併久之日本師興磐入諫以爲小夷險遠勝之不武不勝損威帝震怒曰此在吾國法言者不赦汝豈有他心耶對曰臣赤心爲國故敢言苟有他心何爲脫去叛亂冒萬死來歸乎今臣年已八十況無子他心欲何爲耶明日帝遣侍臣溫慰因以碧玉寶枕賜之於是磐累乞骸骨丞相和禮霍孫爲磐言始命進資德大夫致仕仍給半俸終身以其甥著作郎李穉賓爲東平判官便養焉臨行皇太子賜宴聖安寺公卿百官出送麗澤門外縉紳以爲榮帝始終眷顧每大臣宴見帝數問磐起居狀年九十二卒贈端貞雅亮佐治功臣太傅開府儀同三司洛國公諡文忠磐資性剛方平居不妄言笑每奏對必以正不阿意承順帝嘗以古直稱

之雖權倖側目弗顧也阿合馬方用事致重幣求文其碑磐拒弗與所薦宋道雷厲執初徐炎胡祿適孟琪李謙皆天下賢士也

徐世隆字威卿陳州西華人也弱冠登金正大四年進士第辟爲令其父戒其早仕遂辭官益篤於學父旣沒太宗五年世隆遂奉母北渡河嚴實招致東平幕府使掌書記實卒子忠濟以爲行臺經歷憲宗卽位以實昔得金太常登歌樂命世隆典領樂工以來遂以祀天於日月山語在禮樂志世祖在潛邸久知世隆中統元年遂擢爲燕京宣撫使世隆一以興民善俗爲務中書省檄諸路養禁衛羸馬數以萬計先期戒備芻秣什器世隆曰國馬牧於北方往年無飼於南者上新臨天下京畿根本地必不爲煩擾馬將不來吏曰此軍需也責非輕世隆曰責當我坐遂弗爲備馬果不至三年宣撫司罷世隆還東平請增宮縣大樂文武二舞令舊工

教習以備大祀制可除世隆太常卿以掌之兼提舉本路學校事
四年世祖問堯舜禹湯文武爲君之道世隆取詩書所載編撰以
進帝命翰林承旨安藏譯寫進讀至元元年遷翰林侍講學士仍
兼太常卿世隆奏陛下帝中國當行中國事事莫大於祭祭必有
廟因以圖上乞敕有司以時興建從之廟成遂迎祖宗神御奉安
太室行大饗禮俄兼戶部侍郎承詔議立三省遂定內外官制上
之而朝儀未立世隆又奏立百官朝會儀七年遷吏部尙書世隆
以銓選無可守之法爲撰選曹八議九年乞補外命佩虎符爲東
昌路總管世隆仍務以德率下不事鞭筆吏不忍欺民亦化服郡
人頌之十四年遷山東提刑按察使時有妖言獄有司捕逮凡數
百人世隆剖析註誤者十八九悉縱遣之十五年徙淮東故宋將
許瑣家僮告瑣匿官庫財有司繫其妻孥徵之世隆曰瑣所匿者

故宋之物豈得與今盜官財者同科同儔不從遂獨抗章辯行臺
是之釋不問會征日本世隆上疏諫當路過不以聞十七年召爲
翰林學士又召入集賢皆以疾辭世隆儀觀魁昂而慈祥宏博人
忤之無愠色喜賓客樂施與明習前朝典故尤精律令善決疑獄
二十二年安童再入相奏世隆雖老尙可用遣使召入仍辭以老
疾附奏便宜九事賜田十頃年八十卒四人皆著述在藝文志

孟攀鱗字駕之雲內人也曾祖彥甫爲金西北路招討司知事出
疑獄坐死者百餘人攀鱗幼號奇童金正大七年成進士仕至招
討使金亡居平陽陝西帥府辟詳議官遂家長安世祖中統三年
授翰林待制同修國史至元初條陳數十事大要言宜郊祀天地
祠太廟制禮樂建學校行科舉擇守令以字民儲米粟以贍軍省
無名之賦罷不急之役百司庶府統於六部紀綱法度悉由中書

是爲長久之計帝咨問良久復與論王鶚許衡優劣對曰鶚有文華可置翰林衡明經傳道後學矜式也又嘗召問郊廟儀制攀鱗悉據經典以對時帝將親祀命攀鱗會太常議定禮儀攀鱗夜晝郊祀及宗廟圖以進帝皆親覽焉俄以病請西歸令就議陝西四川行省事四年卒延祐三年贈翰林學士承旨資德大夫上護軍平原郡公諡文定

留夢炎字號中齋衢州西安人也宋純祐四年進士第一累官直學士院宋主禪卽位命兼侍讀咸純元年丞相賈似道請爲總護山陵使夢炎上疏留似道進禮部尙書僉書樞密院事二年遷同知樞密院事明年進樞密使十年詔夢炎知潭州兼湖南安撫使宋主熹卽位詔乞言於老臣夢炎與焉然無所建白也德祐元年左丞相王爚與右丞相陳宜中議事不合夢炎適自湖南入